

## «Ս. ՍԱՀԱԿ - Ս. ՄԵՍՐՈՊ» ՇՔԱՆՇԱՆՆԵՐ ՄՇԱԿՈՒՅԹԻ ԱՆՎԱՆԻ ԵՐԵՔ ԳՈՐԾԻՉՆԵՐԻ

Հունիսի 15-ին Մայր Աթոռ Սուրբ Էջմիածնում, Վեհարանի հանդիսությունների դահլիճում, Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը «Ս. Սահակ - Ս. Մեսրոպ» պատվո բարձր շքանշաններ հանձնեց հայ մշակույթի անդաստանում մեծ վաստակ ունեցող երեք անվանի գործիչների՝ տիկին Սվետլանա Գրիգորյանին, տիար Պերճ Զեյթունցյանին և տիար Ռուբեն Մաթևոսյանին:

Հանդիսավոր արարողության ընթացքին մեծարյալների կյանքի ուղուն և ստեղծագործական վաստակին անդրադարձան Հակոբ Պարոնյանի անվան երաժշտական կոմեդիայի պետական թատրոնի գեղարվեստական ղեկավար Երվանդ Ղազանջյանը, Հայաստանի Գրողների միության նախագահ Լևոն Անանյանը և կոմպոզիտոր Վլադիլեն Բալյանը:

Ապա «Էջ Միածինն ի չօրե» շարականի երգեցողության ներքո ներս բերվեցին Հայրապետական սրբատառ կոնդակները և ընթերցվեցին Մայր Աթոռ Սուրբ Էջմիածնի արխիվի տնօրեն Տ. Ասողիկ քահանա Կարապետյանի կողմից:

Տիկին Սվետլանա Գրիգորյանին տրված կոնդակում ասվում է. «...Թատերասեր հասարակությանը քաջածանոթ և սիրելի են Ձեր անունն ու բարձրարվեստ դերակատարումները: Տասնամյակներ շարունակ Դուք Ձեր տաղանդն ու վարպետությունը հոգու ողջ նվիրումով ծառայեցրել եք հայ թատրոնին: Մեծ է Ձեր վաստակը Երևանի Հակոբ Պարոնյանի անվան երաժշտական կոմեդիայի թատրոնում, որի ներկայացումներն առանձնակի գունեղություն և հնչեղություն են ստանում Ձեր ուրույն դերասանական խաղով: Ի գնահատություն բեմարվեստի ասպարեզում անվանի հայուհուդ նշանակալի հաջողությունների՝ Դուք իրավամբ արժանացել եք պետական բարձր պարգևների ու կոչումների» (տե՛ս էջ 28):

Տիար Պերճ Զեյթունցյանին տրված կոնդակում ասվում է. «... Ձեր գրական գործերը, որ հատկանշվում են խոհափիլիսոփայական մտածողությամբ, ընթերցողին վեր են բարձրացնում առօրյա իրականությունից, հաղորդակցում ճշմարիտ ու մնացյուն արժեքներին, մարդկային վեհագույն խոհերին ու ձգտումներին: Այսօր Ձեր պիեսները հաջողությամբ բեմադրվում են մայրաքաղաքի թատրոններում՝ մեծ ընդունելության արժանանալով թատերասեր հասարակության կողմից: Գոհունակություն է Հայրապետիս համար հաստատել, որ Ձեր արդյունաշատ գործունեության ողջ ընթացքին մշտապես դրսևորել եք որդիական անկեղծ սեր ու հավատարմություն հանդեպ Առաքելական մեր Սուրբ Եկեղեցին և լուսավորչահաստատ Մայր Աթոռ Սուրբ Էջմիածինը» (տե՛ս էջ 24):

«Ձեր նվիրումի ոգին Դուք ամբողջապես արտահայտել եք երգարվեստի ասպարեզում՝ Ձեր աստվածպարզ տաղանդը ի սպաս բերելով արվեստի ճանապարհով Հայրենիքին ու հարագատ ժողովրդին ծառայելու առաքելությանը: Ահավասիկ, տասնամյակներ շարունակ Հայաստանի և աշխարհի տարբեր բեմահարթակներից Ձեզ հատուկ ներշնչանքով Դուք մատուցում եք մեր ազգային երաժշտության գոհարները՝ ունկնդիրներին գրավելով Ձեր ձայնի գեղեցկությամբ ու կատարողական բարձր վարպետությամբ: Երգչի Ձեր հաջողությունների ու ձեռքբերումների խոսուն վկայություններն են պետական բազում մրցանակները, կոչումներն ու պարգևները, բայց առավել՝ ճանաչումն ու անկեղծ սերը երաժշտասեր հայորդյաց: Մեծ ու գնահատելի է նաև Ձեր ավանդը երաժիշտների նոր սերունդ պատրաստելու շնորհա-



«Ս. ՍԱՀԱԿ - Ս. ՄԵՍՐՈՊ» ՇԻՄՆՇԱՆ ՍՎԵՏԼԱՆԱ ԳՐԻԳՈՐՅԱՆԻՆ



կալ գործում: Շուրջ երկու տասնամյակ դասավանդելով Երևանի Կոմիտասի անվան պետական կոնսերվատորիայում, Դուր Ձեր սաներին փոխանցում էք Ձեր գիտելիքներն ու վարպետությունը և արվեստագետի Ձեր ճաշակը՝ նրանց հաղորդ դարձնելով ազգային երաժշտության մաքուր ակունքներին»,- ասվում է Ռուբեն Մաթևոսյանին շնորհված Հայրապետական կոնդակում (տե՛ս էջ 26):

Այնուհետև ծափողոյունների ներքո Ամենայն Հայոց Կաթողիկոսը մեծարյալներին պարգևատրեց «Ս. Մահակ - Ս. Մեսրոպ» շքանշաններով, որից հետո շքանշանակիրներն իրենց սրտի երախտագիտական խոսքն ուղղեցին Նորին Սրբությանն ու ներկաներին: «Շատ պարզներ եմ ստացել, սակայն այսքան չեմ հուզվել»,- նշեց տիկին Գրիգորյանը՝ շնորհակալություն հայտնելով Հայոց Հայրապետին մեր մշակույթի հանդեպ ունեցած հոգածու վերաբերմունքի համար: «Այս շքանշանը հոգևոր իմաստ և խորհուրդ ունի: Հայոց Եկեղեցին Աստծո տուն է, որը մեր ամբողջ պատմության ընթացքին շաղախված է եղել նաև ազգային բովանդակությամբ: Ընկելով և ազգային տուն մեզ համար»,- նշեց տիար Զեյթունցյանը՝ հաստատելով, որ հայ մտավորականությունը միշտ կանգնած է Եկեղեցու կողքին: Հայ ժողովրդի կյանքում Հայ Եկեղեցու առաքելության կարևորությանն անդրադարձավ տիար Մաթևոսյանը՝ ընդգծելով, որ Եկեղեցու շքանշանն ամենից բարձրն է իր կյանքում:

Հանդիսությունն ավարտվեց Ամենայն Հայոց Կաթողիկոսի օրհնության խոսքով: «Հայրապետական պարգևաբաշխության արժանացած այս մտավորականները նրանցից էին, ովքեր դժվարին ժամանակներում շարունակեցին իրենց արվեստով ոգի պարզել մեր ժողովրդի զավակներին: Նրանք եղան այն անձինք, ովքեր դժվարին պայմաններում շարունակեցին իրենց արվեստով հիացնել, մխիթարել և ոգեշնչել մեր ժողովրդին: ...Այն վկայությունը, այն խոսքերը, որ արտասանվեցին այսօր, մեր ժողովրդի անսասան ոգու, անսասան հավատի ու կամքի մասին, իրապես, ոչ միայն մեզ ոգևորություն պարգևեցին, ոչ միայն մեզ հպարտություն ներշնչեցին ու խանդավառեցին, այլ նաև այս վկայությունները լավատեսության ոգով համակեցին դեպ մեր վաղվա օրը»,- ասաց Հայոց Հայրապետը՝ բարձր գնահատելով մեծարյալների հայրենասիրությունը, հայրենի հողի ու մեր ժողովրդի հանդեպ ունեցած իրենց մեծ և անհուն սերը, որը մղել է նրանց աշխատելու և ստեղծագործելու, կերտել է նրանց բարի անունը, դարձրել նրանց մեր ժողովրդի արժանավոր զավակներ:

Հանդիսության ընթացքում գեղարվեստական տարբեր կատարումներով հանդես եկան «Նոր անուններ» ծրագրի պատանի երաժիշտները՝ գեղարվեստական ղեկավարությամբ տիկին Սիլվա Մեքինյանի:

ՄԱՅԸ ԱԹՈՌ ՍՈՒՐԲ ԷԶՄԻԱԾԻՆ  
ՏԵՂԵԿԱՏՎԱԿԱՆ ՀԱՄԱԿԱՐԳ